

名山藏

中冊

〔明〕何喬遠撰



八閩文獻叢刊

名山藏

中冊

〔明〕何喬遠撰

張德信

商傳點校

王熹

福建人民出版社

名山藏卷之三十七

分藩記二

蜀王

湘王

代王

肅王

遼王

慶王

寧王

岷王

蜀獻王椿，國成都。母郭惠妃，潞陽王女也。王徇慧能文，一目五行下。闢西堂，延攬名士李叔荆、蘇伯衡等商推文史。高帝呼爲「蜀秀才」。既之國，聘方孝孺爲世子傳，表之曰「正學」，令國人師之。造安車，以賜長史陳南賓。分成都學博士以月餼，曰：「後世子孫皆如我餼博士。」陳南賓，茶陵人。洪武二年，應聘至京師，除無棣丞，轉膠州同知。所至先教化。十一年，遷國子助教。入見，高帝命講洪範九疇。上大喜，稱善，書其姓名于殿柱。二十二年，擢蜀府長史。隨事規諫，王甚敬禮之。王守西陲，施惠而崇教。西陲之人安焉。天下言忠孝仁義，必歸王。

成祖即位，來朝。辭歸，賜勅獎慰，賜鈔二萬，從官皆賜宴鈔有差。王有所獻，荔枝、艾

虎、聚扇、香囊、綵花諸物。賜答曰：「送至荔枝諸物，具見厚意。惟賢弟抱明達之資，敦忠孝之義，秉心存誠，好學不倦。東平、河間無以過也。引睇遐邇，朝夕不忘，勉自愛重。」谷王穗，王母弟，圖不軌，私告王。王驚，大怒罵，谷王不從。密奏之。成祖悅，賜王黃金二百兩，白金千兩，鈔四萬錠，玉帶一圍，袞衣九襲，綺繡五十匹，錦綉十匹，綵絹千匹，兜羅綿十條，高麗布百匹，米千石，胡椒千斤，馬十四，鞍二。曰：「以旌周公。」久之，王來朝，又賜白金三千兩，〔一〕鈔六萬錠，米萬石，雜繒五百匹，紗、羅各二百五十匹，〔二〕絹千匹，兜羅綿六十條，蘇木五千斤，胡椒三千斤，馬百五匹，鞍二，火者百。其從官皆賚有差。王四十二年薨。

子悅嫌不及王，諡悼莊世子。孫有堉立，是爲靖王。王八年薨，亡子，妃李、侍姬黃自經以從。弟友壘以羅江王進封，是爲僖王。王淳謹無過，章帝重之。疾，使醫視。王三年薨，亡子。保寧王悅襲進封，是爲和王。王節儉飭禮。王二十年薨，繼妃徐氏年二十六，死以從。賜諡靜節。子友垓立，是爲定王。王工詩，善草書。王一年薨。子申鉉立，是爲懷王。王八年薨，亡子。弟申鑿以通江王進封，是爲惠王。王好學能文，亦善書。王二十二年薨。子賓瀚立，是爲昭王。王仁好儒。王十五年薨。子讓栩立，是爲成王。王好學善書，肅帝時，以忠孝賢良旌。二十年，建太廟，獻黃金六十斤，白金六百斤。王三十八年薨。子承爚立，是爲康王。王以仁孝稱。王十年薨。今王宣圻立。蜀世多賢王也。

蜀獻王六子：

悼莊世子悅嫌。

華陽王悅耀。放肆不順，獻王惡之。王有所愛卒王除爲千戶，獻王大怒，捽罵之曰：「不朝命，反耶？」杖之百，將械於朝。世孫友堦爲請，乃釋之，而猶囚繫之數月。會太宗召冠友堦於京師，已行，獻王薨，悅耀竊發帑藏悉取之。友堦歸，不問。悅耀反誣奏友堦數十事，意在奪其王。成祖召入廷辯，會晏駕。仁宗即位，遣按察副使信廉之，得其誣，遂命友堦嗣王，召悅耀。悅耀至，猶誣奏，上怒，抵其奏地下，遷之武岡。其後，以徙岷王武岡，徙澧。王薨，子友堦立。堦與其弟鎮國將軍友壁弗友也，天順間，訟於朝，上兩戒諭之，錄其罪狀，遍示宗室諸王。堦薨，子申燧立。燧薨，子賓涎立。涎薨，子讓潑不及封，孫承燧立。燧薨，今王宣堦立，長子奉銳。

悅燧封崇寧，不得於蜀王，逃之谷王穗所。谷王匿之，令自稱爲建文君，共舉大事。王不從，竟歸，天，除。

悅圻封崇慶。天，除。

和王。先封保寧，進爲王。

永川王悅煇。薨，亡子，王妃何殉王，諡貞順。除。

悼莊世子三子：

靖王。

黔江王友圻。夭，除。

僖王。自羅江王封。

蜀和王六子：

定王。

內江王友藩。藩薨，子申銹不及封，孫賓沚立。沚薨，子讓枌亦不及封，孫承燾

立。燾薨，今王宣罥立。

德陽王友城。〔三〕城薨，子申銑立。銑薨，子賓灘立。亡子，除。有宗室。

石泉王友墳。墳薨，子申縛立。縛薨，子賓清立。清薨，子讓機立。機薨，今王承

燭立。

汶川王友墻。墻薨，子申銷立。銷薨，子賓沙立。沙薨，子讓杔不及封，今王承炯

立，長子宣驩。

慶符王友堦。堦薨，子申鍬立。鍬薨，子賓沾立。沾薨，今王讓儀立，長子承煊。

蜀定王三子：

懷王。

惠王自通江王封。

南川王申鋸。鋸薨，長子賓恂與其孫讓檐先卒，亡後，王次子賓濤子讓樺嗣王。

樺薨，子承燂先卒，今王宣釐立。

蜀惠王二子：

昭王。

庶子賓溥。未封，卒。

蜀昭王一子：

成王。

蜀成王一子：

康王。

蜀康王二子：

今王。

今王宣址，封江安，長子奉鏞。

世子奉銓。

奉鉞封新寧，未婚，薨。

三子奉銘，未封。

四子未名。

五子未名。

臣爲郎時，蜀自王而下，凡二百四十有七宗。

湘王柏，母胡順妃，豫章侯美女，而王妃則江陰侯高女也。洪武十一年，用皇子封，國荆。讀書能韻，篝燈警枕，囊書自隨，被服儒雅。兼有神仙之氣，望之如玉山晴霞。而武力過人，有俠氣。數從楚王將兵，有功。建文初，坐僞造寶鈔、虐殺人，降勅切責。朝議發兵討之，王怒，焚其宮室美人，乘馬執弓，躍入火中死。凡王二十二年。諡戾，國除。成祖即位，追諡獻。

代簡王桂，初封豫，後封代，國大同。王與蜀王同母，蜀賢而王暴。建文時，廢爲庶人，

使如蜀觀蜀王之法。

成祖即位，復王。王返國不悛。永樂元年，賜王書曰：「別久懷思。聞吾弟縱戮取財，國人甚苦，告者衆矣。果若其言，吾弟大謬。夫天下之人，皇考四十年辛勤保養，以遺子孫。其罪合死，猶當請命，況乃實無。吾弟審思，拘囚困辱，不記建文時邪？」已，條王三十罪，勅讓之。召王朝，王不朝。再召，乃朝。至中道，勅曰：「爾傲狠悖慢。朕念同氣，不遽絕。面召訓爾，爾拒不至。再命，始就道。今其歸國，省愆改行。」遂革去其三護衛，留校尉三十人從王。

王老矣，尚時時與其子遜炆、遜埳，短衣小帽，袖錘斧傷人市中，誘納軍民婦女入宮。移怒其子遜熾，母子出居外舍於山西行都司，甚困。王有妃徐甚妬。王寵其侍女二人，妃糞其口，漆其身，傳藥潰爛之，復潛令衛卒仲謙誘之亡去。王六十九年薨。

遜熾先王卒，諡悼戾世子。其子仕壘立，〔四〕是爲隱王。隱王立，追封悼戾世子爲戾王。英宗五年，以代隘，徙封懷仁於霍山陰，襄垣於蒲，靈丘於絳，宣寧、隰川於澤。王惡其子定安、博野二王，請亦在徙中。定安王上書不忍遠王。英宗曰：「王遠子，胡越人哉？」不許。王十八年薨。子成鍊立，是爲惠王。王二十四年薨。子聰沐爲世子時，先封武邑王，以使酒毆樂工，革爵。已，居惠王喪，益醢淫，召妓歌舞。內使諫，輒拷掠之。或觸其怒，以

石鼓壓胸，囊沙覆口，死者數人。坐降爲庶人，遷太原。久之，惠王夫人爲沔理，乃使以革爵武邑王稱於代。亡何，薨，子俊秋立，是爲懿王。追封武邑爲思王。嘉靖初，大同卒叛，圍王宮，王避之宣府。已，乃還。王二十九年薨，子充燿立，是爲昭王。王十八年薨，子建埼立，是爲恭王。王二十五年薨，今王肅鉉立。

代簡王十一子：

戾王。以悼戾世子追封。

廣靈王遜焄。〔五〕焄薨，子仕塏立。塏薨，子成鏐立。鏐薨，子聰漢立。漢薨，子俊槻立。槻薨，子充燧立。燧薨，今王廷埏立，長子肅鈐。

潞城王遜烱。烱薨，子仁棟立。棟薨，子成鐫立。鐫薨，子聰蒨立。蒨薨，子俊棱立。棱薨，子充煥立。煥薨，今王廷埏立，長子肅鐔。

山陰王遜堪，居蒲。王薨，子仕楓立。楓薨，子成鏊立。鏊薨，子聰澍立。澍薨，今王俊柵立。王多才藝，好佛。數上書求開宗藩應舉之路。長子充熙。

襄垣王遜燁，居蒲。景泰初，以孝旌，而有鷹犬之好。王薨，子仁壘立。壘不孝不友，有淫行。成化中，廢爲庶人。弘治中，以淫暴賜死，國除。凡以罪除者，弟侄毋得

繼爵。王有弟曰仕坯，其子成鏐，多設財爲仕坯求王，仕坯得王。未封薨，成鏐立，竟坐冒封，除。

靈丘王遜烜，居絳。爲人驕侈，而聰敏多能，精通醫道。歲疫，施藥活病，遇井投之，民皆德王。王薨，子仕塲立。塲事父母，一日三問安。父亡，哀毀頓絕，水漿不入口者四日。成化十三年，賜勅獎諭。塲薨，子成銳立。銳事塲謹。沒，廬墓，以孝旌。王薨，子聰渴立。渴亦以孝旌。年八十餘薨，子俊格、孫充煥、曾孫廷址皆不及王。世宗好壽考，以聰渴壽，特予封址子鼎鏐爲玄長孫以寵之。俊格嗜學，善屬文，聚書萬卷，尤好古篆籀墨蹟。鼎鏐爲王。隆慶中，坐淫刑戮死曾叔祖，降庶人，除爵。有宗室。

宣寧王遜料，居澤。正統中，王府教授楊普言：「王狎軍人武賓，箠殺軍人武保兒。與賓博戲，唯日不足。」朝廷杖治賓，下書責戒。王薨，子仁壩立。壩薨，子成銘立。銘薨，子聰灝立。灝薨，子俊相立。相薨，今王充燦立。

懷仁王遜煊，居霍，王與宣寧王同出母徐氏。徐數入王宮，盜其財物，與二王，詭言盜劫，乃威逼世孫以求免。王薨，子仕壕不及封，孫成鈹立。鈹薨，子聰淑立。亡子，以弟聰冽子俊樹嗣，竟以冒除封。有宗室。

遜煇，未封，卒。

隰川王遜燿，居澤。簡王之官人劉生一女，封壺關郡主，劉愛之，時以祿米給儀賓秦安。王數阻之。已而，簡王出一合封識賜王，啓之，則無首麪人及羊肝等物。事聞，出劉王□魘魅。〔六〕虜奉英宗駕至大同，王進衣衾飲饌。王薨，子仕燧立。燧薨，子成鈞立。鈞薨，子聰濊立。濊薨，子俊柏立。柏薨，亡子，除。有宗室。

遜燾，未封，卒。

代戾王二子：

隱王。

昌化王仕潭。潭薨，子成鑐立。鑐薨，子聰濬立，亡子，除。有宗室。

代隱王七子：

惠王。

定安王成鱗，居忻。王薨，長子聰涵不戚坐尼。封子以下皆爲奉國將軍。

博野王成鏤。鏤薨，子聰濤立。濤薨，子俊檣立，亡子，除。有宗室。

和川王成鏐。鏐薨，子聰潛立。潛薨，子俊壘立。壘薨，子充煇立。煇薨，子廷城立。城薨，今王鼎鉉立。嘉靖二十四年，府中奉國將軍有曰充灼者，聚兇徒淮等酗酒

作奸，坐奪祿，怨望，乃與襄垣府中尉充燮謀引虜入大同，殺代王以舉事。淮密告其黨仲太，仲太曰：「我師羅廷璽來，濟矣。」廷璽，應州人。故與其黨王廷策以白蓮惑衆。淮遂因仲太見廷璽。廷璽入見，稱充灼有天命。充灼大喜，因爲畫計，約奉虜小王子入大同居之。遂攻鴈門，取平陽，立充灼爲王，將胡兵四討。事定，然後計殺小王子。充灼然之。先遣人陰持火箭焚大同積芻五六所。事敗，伏誅。大同總督侍郎翁萬達疏言：「大同土產狹瘠，祿餉不支。代宗胤育日繁，衆聚而貧。且地近胡，易生反側。請量遷和川、昌化諸府於山、陝隙地。」禮部覆議，改遷於山西。詔曰「可」。

寧津王成鈐。鈐薨，子聰滴立。滴薨，亡子，弟聰冷立。冷薨，子俊棣立。俊除以父冒兄封，〔七〕除。有宗室。

棣強王成舒。舒薨，子聰滋立。滋薨，子俊棟不及封，孫充燭立。燭薨，今王廷坑立。

饒陽王成鎔。鎔薨，子聰澈立。澈薨，子俊棟不及封，孫充熙立。負才辯，盛黨與。嘉靖中，數以事侵恭王，恐得罪。世宗念邊，乃以陳言邊事爲名，先暴揚鎮、巡官之惡。世宗爲逮繫巡撫何思、總兵徐仁等。充熙益驕，遂與恭王互相訐奏，累疏自訟，

利口捷給，前後勘官莫能判。巡撫侯趙奏奪其祿，充熙怒不承，出不遜語。世宗遣司禮少監王瑜即訊，乃知充熙誣奏，下法司，錮高牆。

代惠王四子：

思王。

樂昌王聰涓，居朔。王薨，子俊福不及封，孫充燾立。燾薨，今王廷孺立。

吉陽王聰注。注薨，子俊權立。二王皆以壽終，今王充熠立。

溧陽王聰漸。漸薨，子俊樞立。樞薨，子充昱不及封。

代思王二子：

懿王。

進賢王俊楨。楨薨，子充炆立。炆薨，子廷培立，亡子，除。有宗室。

代懿王五子：

昭王。

河內王充熾。熾薨，子廷垸嗣，亡子，除。

富川王充煜。煜薨，子廷埜立。埜薨，子鼎鍵不及封，子鼎鐸。

寶豐王充炆。亡子，除。

礪山王充炆。亡子，除。

代昭王一子：

恭王。以泰興王進封。

代恭王四子：

今王。以太平王進封。

新寧王肅鈞。萬曆三年罪，革半祿。

永慶王肅鈺。鈺薨。

四子幼。

臣爲郎時，代自王而下，凡二千七百有三宗。

肅莊王模，母曰郃氏。初封漢，二十五年改封肅，國甘。建文初，移國蘭。王四十二年薨。

子瞻焰立，是爲康王。宣德八年，王上二護衛。天順三年，求府中馬備邊，予之直，不

受，自具上好馬五百，上强直之，致書褒美。王四十一年薨。子祿埤立，是爲簡王。王十二年薨，子貢鎔立，是爲恭王。王五十年薨，子真淤，博雅好文，善爲詩，不及王，諡安和世子。孫弼桃立，是爲定王。追封安和世子爲靖王。定王王二十四年薨，世子縉炯不及王，孫紳堵立，是爲懷王。追封世子爲昭王。懷王王二年薨，年十七耳。亡子，靖王季子弼柿之子縉燭以鎮國將軍攝。已，求爲真，許之，祿則仍鎮國，是爲懿王。追封弼柿爲安王。懿王王十八年薨。今王紳堯立。

肅莊王一子：

康王。

肅康王一子：

簡王。以洵陽王封。

肅簡王一子：

恭王。以汾川王封。

肅恭王六子：

靖王。

淳化王真泓。泓薨，子弼果立。果薨，長子縉勳，長孫紳坑。

鉛山王真澣。澣薨，子弼幹立。幹薨，今王縉膺立。

金壇王真洵。王比小人橫於外，事覺，下獄，當死，越獄。其子弼榘酗酒，多犯法，

無禮於王。王離之，坐廢爲庶人，幽高牆，除。有宗室。

會寧王真潤。潤薨，子弼楹不及封，今王縉剡立。

延長王真澆。澆薨，子弼棟不及封，今王縉燬立。

肅靖王七子：

長子弼桓不及封，亡子。

定王。

鎮國將軍弼栢。

鎮國將軍弼柿。以子懿王追諡安。

鎮國將軍弼栲。

今王弼枳。封開化。子縉燧封長子，孫紳護封長孫。

今王弼棟。封會昌。

肅定王二子：

昭王。